

Pablo Filipocjārārē ojāca pūrī ni'i

A'ti pūrī a'tiro weero ojanopā nise ni'i

Pablo Filipino wāmetiri macā Macedonia di'tapū ni'ri macācjārārē ojacu niwī.

Toduporopure ti macāputa Jesucristo ye quetire were, cūrē ējōpeori curuacjārā sājācā weecu niwī. Bu'iri da'leri wi'ipū nīgū, ojacu niwī.

Ti macācjārā Jesucristore ējōpeorā cūrē niyeru weetamu'quere wācūgū, narē e'catise o'ocu niwī. Na te niyerure Epafrdito me'rā o'ocārā niwā. Cū papera miarī masū nicū niwī. Be'ro Pablo tiropū dutitia wa'acu niwī. Tojo wa'acā, Pablo cūrē co'te, be'ro Filipopū o'ótōrōcu niwī tja.

Pablo ti macācjārārē ojagu, ne cā'rō mejēcā ucūma'aticū niwī. E'catisere, na añurō ējōpeose pe'ere ucūyurūnū'cācu niwī. “Mejō nirá ni'i nisere wācūña”, nicū niwī. Tojo nicā Jesucristore ējōpeorā queoro weeya nisere ojacu niwī.

Pablo Jesucristore ējōpeori curuacjārārē oja'que ni'i

¹ Yū'u Pablo, tojo nicā Timoteo Jesucristore da'ra-co'terā ni'i. Ūsā nipe'tirā mūsārē Jesucristore ējōpeorā Filipopū nirārē oja'a. Tojo nicā Jesucristore ējōpeori curuacjārā sū'ori wejepeorā quē'rārē oja'a. Narē weeta-muco'terā quē'rārē oja'a.

² Ō'acū marī pacū, Jesucristo marī wiogu mūsārē añurō weeato. Mūsārē ejerisājācā weeato.

Jesucristore ējōpeorārē Pablo sērībosase ni'i

³ Yū'u mūsārē wācūsetirinucū yū'u wiogu Ō'acūrē e'catise o'o'o. Mūsā añurō weese bu'iri tojo wee'e.

4-5 Ne waropu musã Jesucristo ye quetire tu'orã, yu'ure weetamunu'cãwũ. A'tiro nicã quẽ'rãrẽ tojota weenu'cũ'u. Tojo weegu musã nipe'tirã ye niatjere Õ'acũrẽ e'catise me'rã sãribosanu'cũ'u. ⁶ Õ'acũ musãrẽ añurõ weesere yu'u masiyu'rucãpu'ticã'a. Õ'acũ musãrẽ añurõ ducayunu'cãcu niwĩ. A'tiro nicã quẽ'rãrẽ ducayugu weemi. Téé Jesucristo a'tiri curapu tojo ducayuyapatigusami. ⁷ Yu'u a'tiro wãcũ'u: “Õ'acũ narẽ tojo ducayunu'cũgũsami”, ni'i. Yu'u tojo wãcũse añu ni'i. Musãrẽ ma'ígũ, tojo busu'u. A'tiro ni'i. Ni'cãrõacãrẽ yu'u bu'iri da'reri wi'ipu nicã, musã yu'ure bu'ipejatamu'u. Wiorãrẽ “Jesucristo masãrẽ yu'rũomi nise queti diacũ ni'i” werecã quẽ'rãrẽ, bu'ipejatamu'u. Tojo weerã Õ'acũ yu'ure weetamusere musã quẽ'rã bu'ipejatamu'u. ⁸ Õ'acũ yu'u musãrẽ uputu ma'isere masĩmi. Yu'u musãrẽ ma'ígũ, Jesucristo cũ pajaña'se me'rã ma'i'i. ⁹ Musãrẽ “Nemorõ a'merĩ ma'lnemoato”, ni sãribosa'a. “Nipe'tisere añurõ masise me'rã tu'ocasanu'cõpe'oato”, ni'i. ¹⁰ Tojo weerã musã “A'tiro weerõa'a”, nímasĩrãsa'a. Ña'arõ weesere moorãsa'a. Jesucristo a'ticã, bu'iri marĩrã bocaejano'rãsa'a. Añuse dia'cũ wéerã bocaejano'rãsa'a. ¹¹ Jesucristota musãrẽ nipe'tisere añurõ weecã weegusami. Musã tojo weecã ï'arã, masã Õ'acũrẽ a'tiro wãcũrãsama. “Añuyu'rũami, añuse weemi”, nirãsama.

Jesucristo nipe'tise yu'rũoro niyu'rũnu'cãmi nise ni'i

¹² Yu'u bu'iri da'reri wi'ipu nimicã, Jesucristo masãrẽ yu'rũomi nise queti nemorõ se'sa wa'asa'a. Acawererã, musãrẽ tere masĩcã ua'a. ¹³ Yu'u bu'iri da'reri wi'ipu nígũ, surarare Jesucristo masãrẽ yu'rũomi nisere were'e. Tojo weerã nipe'tirã surara, wiogu ya wi'ipu co'terã a'tiro nima: “Cũ Jesucristore sirutuse wapa, bu'iri da'reri wi'ipu nimi”, nima. ãpẽrã quẽ'rã masĩpe'ticã'ma. ¹⁴ Yu'u bu'iri

da'reri wi'ipɯ niyucã, pãjãrã marĩ acawererã wãcũtu-tuama. Te ye bu'iri na marĩ wiogũre ãjõpeonemorã, uiro marĩrõ Õ'acã ye quetire werema.

¹⁵⁻¹⁷ Æpẽrã pe'e yu'ure uorã, Jesucristo yere werema. Na bu'ese pe'ere sirutudutirã tojo weema. Na, na ye cjasere wãcũrã weema. Queoro wãcũtimirã, Jesucristo yere werema. Yu'ɯ bu'iri da'reri wi'ipɯ nicã, cũrẽ bujawetise doquepejato nĩrã tojo weema.

Æpẽrã pe'e Jesucristo ye quetire añurõ weesĩ'rĩse me'rã werema. Yu'ure ma'ĩrã, tojo weema. Na a'tiro masĩma. “Cũ Jesucristo ye quetire queoro ucũse bu'iri cũ bu'iri da'reri wi'ipɯ nimi”, nima. ¹⁸ Æpẽrã yu'ure ña'arõ weesĩ'ricã, añurõsa'a. No'o yu'ure ma'ĩrã, ma'itirã, Jesucristo yere wererã weema. Na tojo weesere tu'ogɯ, e'cati'i.

Tojo e'catinu'cũgũsa'a. ¹⁹ A'tiro ni'i. Mũsã sẽrĩse me'rã, tojo nicã Espĩritu Santu Jesucristo o'o'cu yu'ure weeta-muse me'rã nipe'tise yu'ure wa'ase añurõ yapatirosa'a. A'tere masĩ'i. ²⁰ Yu'ɯ Jesucristo yere weretigɯ, bopoy-abosa'a. A'tiro pe'e ɯasa'a. Uiro marĩrõ wãcũtuase me'rã cũ yere werenu'cũsĩ'rĩsa'a. Ni'cãrõacã quẽ'rãrẽ yu'ɯ weenu'cũrõnojõta weesĩ'rĩsa'a. Tojo weegɯ yu'ɯ bu'iri da'reri wi'ipɯ nĩ'cu wijaacã, o yu'ure wẽjẽcã, a'tiro wa'acã ɯasa'a. Nipe'tise yu'ɯ weese me'rã Jesucristore masã nemorõ masĩcã ɯasa'a. Cũ añubutiasere siape me'rã masĩnemocã ɯasa'a. ²¹ Nipe'tiro yu'ɯ catiro põtẽorõ Jesucristo ɯaro weesĩ'rĩsa'a. Yu'ɯ pe'ema cũ Æpẽrã, apeyenojõ yu'ruoro niyu'rũnũ'cãmi. Yu'ɯ wẽrĩgũ, cũ me'rã nigũsa'a. Cũ me'rã nicã, añuyũ'rua'a. ²² Yu'ɯ catigɯ, marĩ wiogɯ ye cjasere da'ramasĩ'i. Tojo weegɯ yu'ɯ wẽrĩcã, o caticã, añu nibosari nĩmasĩtisa'a. ²³ A'te puaro besecã, diasã ni'i. Wẽrĩgũ, Jesucristo me'rã nibosa'a. Tojo weegɯ “Wẽrĩcã, añubosa'a”, ni tu'oña'a. ²⁴ “Yu'ɯ catigɯ pe'e, mũsãrẽ

nemorõ weetamubosa'a", ni tu'oña'sa'a. ²⁵ Tojo weegu yu'u masi'i, musã me'rã nínigüti yujupu. Musãrẽ nemorõ weetamugüti nígũ, tojo weeguti. Tojo nicã musã ãjõpeose me'rã nemorõ e'catiato nígũ tojo weeguti. ²⁶ Tojo weerã apaturi yu'u musã tiropu nicã, Jesucristo yu'ure co'tese wapa, nemorõ cürẽ e'catise o'orãsa'a.

²⁷ Nipe'tise musã weesetisere Jesucristo ye queti níronojõta weeya. Musã tojo weecã, musã tiro nígũ, o yoropu nígũ, musã añurõ weesere tu'oguti. Musãrẽ ni'cãronojõ añurõ ãjõpeonu'cücã uasa'a. Tojo nicã wãcütutuase me'rã ni'cãronojõ Jesucristo ye quetire wereturiacã uasa'a. ²⁸ Jesucristo ye quetire uatirã musãrẽ ña'arõ weecã, uiticã'ña. Tojo weerã na pecame'epu wa'atjere masirãsama. Musã pe'e quẽ'rã uitirã, musãrẽ yu'ruono'atjere i'orãsa'a. Õ'acüta musãrẽ yu'ruo, uiro marirõ nisetiã weemi. ²⁹ Õ'acü musãrẽ ma'ígũ, Cristore ãjõpeodutiwĩ. Jesucristore ãjõpeo'que bu'iri musãrẽ ña'arõ weerãsama. Te quẽ'rãrẽ Õ'acü cüuwĩ. ³⁰ Jesucristore ãjõpeose bu'iri marĩ ni'cãronojõ pi'eti'i. Toduporopu musã ya macãpu yu'ure tãrã, bu'iri da'reri wi'ipu cüucã i'awũ. Ni'cãrõacã quẽ'rãrẽ mejãrõta yu'ure ña'arõ weesere tu'osa'a.

2

Jesucristo wee'caronojõ weedutise ni'i

¹⁻² Jesucristo musãrẽ wãcütutua e'caticã weemi. Cũ musãrẽ ma'ígũ, weetamumi. Espiritu Santu musã me'rã nimi. Tojo weerã musã ma'isere, pajaña'sere cuorã, a'tiro weeya. Añurõ ni'cãrõ me'rã nisetiya. Ni'cãronojõ a'merĩ ma'iña. Espiritu Santu me'rã ni'cãrõta wãcüsetirã niña. Tojo weese me'rã yu'ure e'catinemocã weerãsa'a. ³ Musã ye dia'cürẽ uasaticã'ña. “Ãpẽrã yu'ruoro ni'i”, niticã'ña. Ãpẽrã pe'ere “Añuyu'runu'cãma”, ni tu'oña'ña. ⁴ Musã ye

cjase dia'cūrē “Añurō wa'ato”, ni wācūtīcā'ña. Āpērā ye quē'rārē “Añurō wa'ato”, ni wācūña.

⁵ Mūsā Jesucristo wācūseti'caronojōta wācūsetiya. Cū “Āpērā yu'rūoro añugū ni'i”, niticū niwī. ⁶ Cū Ō'acū nisetisere cuomigū, “Yu'u a'ti nucūcāpu a'tigu, Ō'acūrē ni'cārōwijisere ne du'usome”, niticū niwī. ⁷ A'tiro pe'e weecu niwī. Cū ūaro me'rā cū wioḡu nisere du'ucu niwī. Du'u, a'ti nucūcāpu a'tigu, apīrē da'racoteḡu weronojō wa'acu niwī. A'ti upu me'rā bajuacu niwī. ⁸ Tojo weegu masū weronojō bajugu, mejō nigū wa'acu niwī. Masā “Cūrē curusapu paabi'peya” nicā, cū pacure yu'tigu, yu'rūnu'cāticu niwī. Cū curusapu ña'arō wērīmigū, cū pacure yu'rūnu'cāticu niwī. ⁹ Cū, cū pacure yu'tise bu'iri Ō'acū nipe'tirā bu'ipu sōrōcu niwī. Cū wāmerē āpērā wāme yu'rūoro añurō wācūdutigu, tojo weecu niwī. ¹⁰ Tojo weerā nipe'tirā ū'mūsepu nirá, a'ti nucūcāpu nirá, wērī'cārā Jesú wāmerē tu'orā, ejaque'ape'tirāsama. ¹¹ Nipe'tirā “Jesucristo marī wioḡu nimi”, nirásama. Na Ō'acūrē, “Añuyu'rūami”, nirásama.

Jesucristore ējōpeorā ña'arō weerārē añuse queose ī'orāsama nise ni'i

¹² Acawererā, yu'u mūsārē ma'i'i. Toduporopu yu'u mūsā me'rā nícaterore yu'u duti'quere yu'tiwu. Ni'cārōacārē yu'u yoaropu ni'i. Tjāsa'a majā. Totā nemorō yu'tiya. Ō'acū mūsārē yu'rūocu niwī. Tere wiopesase me'rā wācūña. Tere wācūrā, “Āpērā yu'rūoro ni'i”, nirō marīrō nisetiya. Añurō niyapatiya. Ña'arō weeri nirá, tojo weeya. ¹³ A'tiro ni'i. Mūsārē Ō'acū añurō weesī'ricā weesami. Cū ūaronojō mūsārē añurō tu'ajan'cōcā weesami.

¹⁴ No'o nipe'tisere wéerā tu'satimirā, ūrūsāse me'rā weeticā'ña. ¹⁵ Tojo weerā Ō'acū pō'rā ña'ase marīrā, bu'iri

moorã nirãsa'a. Musã a'ti turicjãrã nisoori masã ña'arõ weesetirã wa'teropu ni'i. Musã añurõ wéerã, narẽ añurõ, queoro weesere ñ'orãsa'a. ¹⁶ Añuse catise pe'titise quetire wererãsa'a. Musã añurõ weese me'rã yu'u musã tiropu bu'esija'quere a'tiro nigũti. Jesucristo apaturi a'ticã, yu'u mejõ waro narẽ bu'etipã nígũ, e'catiguti. ¹⁷ Masã musãrẽ ña'arõ weemicã, musã Jesucristore ãjõpeonu'cũ'u. Musã ãjõpeose Õ'acũrẽ añuse o'ose weronojõ ni'i. Yu'u Jesucristo yere werese wapa yu'ure wẽjẽcã, Õ'acũrẽ añuse o'onemorõ weronojõ nirõsa'a. Tojo wa'acã, yu'u e'catigusa'a. Musã quẽ'rãrẽ e'caticã weegusa'a. ¹⁸ Musã yu'ure e'catitamurãsa'a.

Timoteo, Epafrodito ye cjase ni'i

¹⁹ Marĩ wiogu Jesu hacã, maata Timoteore musã tiropu o'óguti. Musã ye quetire tu'ogu, e'catiguti nígũ, tojo weeguti. ²⁰ Timoteo dia'cũ yu'u weronojõ wãcũmi. Cũ yu'u weronojõ musãrẽ añurõ wa'acã uagu, uputu wãcũque'timi. ²¹ Æpẽrã na ye dia'cũrẽ añurõ wa'acã uasãsama. Jesucristo ye pe'ere tojo wãcũtisama. ²² Musã pũrĩcã Timoteo queoro weesere masĩtojasa'a. Cũ yu'u me'rã ni'cũ cũ pacu me'rã da'ragu weronojõ Jesucristo ye quetire weretamugũ weemi. ²³ Tojo weegu yé cjasere añurõ masĩca be'ro cũrẽ musã tiropu o'óguti. ²⁴ Cũrẽ o'ósĩrĩmigũ, yu'u quẽ'rã Jesucristo marĩ wiogu o'ócã, maata musã tiropu wa'agusa'a.

²⁵ “Apetero weegu Timoteo me'rã apĩ marĩ acaweregu Epafroditore o'órouasato”, ni wãcũ'u. Epafrodito yu'u me'rã tutuaro Jesucristo yere weretamumi. Musã basu yu'ure weetamudutirã cũrẽ o'ócãrã niwũ. ²⁶ Cũ musãrẽ pũrõ ñ'asĩrĩmi. Cũ dutitise quetire musã masĩcã tu'ogu, pũrõ bujawetiwi. Tojo weegu cũrẽ o'óguti. ²⁷ Diacjũta ni'i, pũrõ waro wa'awĩ. Wẽrĩse pu'to niwĩ. Cũ pũrõ dutitimicã, Õ'acũ cũrẽ pajaña'wĩ. Cũ se'sarore tojo weetiwi. Yu'u

quē'rārē pajaña'wī. Epafrodito wēřĩcāma, yu'u nemorō waro bujawetiyu'rūabopā. Tojo wa'acā uatigū, Ō'acū cūrē yu'rūowī. ²⁸ Musā cūrē ĩarā, e'catiato tja nígū o'ó'o. Musā e'catise quetire tu'ogu, yu'u quē'rā e'catigusa'a. ²⁹ E'catise me'rā cūrē ñe'eña. Jesucristore ējōpeogu marī acaweregū nimi. Nipe'tirā cū weronojō nirārē añurō weeya. ³⁰ Epafrodito Jesucristo yere da'raco'tetjāgū, wēřĩa wa'amiwī. Musā yu'ure weetamuta basiotisere weetamusĩ'řigū, tojo wa'awī. Tojo weerā cūrē añurō ñe'eña.

3

Pablo “A'tiro nisetiroua'a” ní'que ni'i

¹ Acawererā, ni'cārōacārē musā Jesucristo yarā nitjārā, e'catiya. Yu'u todūporo ní'quere apaturi ninemocā, yu'ure mejēcā niwe'e. Yu'u ninemocā, añu ni'i musārē. ² Ña'arō weerārē tu'omasĩña. Na Ō'acū yarā niato nírā nipe'tirārē ō'rēcju yapa caserore yejecō'adutima. ³ Marī pūrĩcā tojo weetimirā, Jesucristore ējōpeotjārā, diacjū Ō'acū dutisere añurō weerá ni'i. A'tiro ni'i. Espíritu Santu weetamuse me'rā Ō'acūrē ñubuepeo'o. Tojo nicā Jesucristo marĩpūre niyucā, pūrō e'cati'i. “Masā weese-tise bu'icjase me'rā yu'rūrāsa'a”, niwe'e. ⁴ Yu'u pūrĩcā “Yu'u weeseti'que ye bu'iri yu'rūgusa'a”, nímāsĩ'i. Yu'u a'tere nipe'tirā nemorō nímāsĩ'i, nígū pe'e. ⁵ A'tiro ni'i yu'ure. Ocho nūmūrĩ yu'u bajuáca be'ro yu'u ō'rēcju yapa caserore yejecō'acārā niwā. Yu'u Israe curuacjū Benjamí ya curuacjū ni'i. Yu'u hebreo masū ni'i. Yu'u pacusūmua quē'rā náta niwā. Yu'u Moisé duti'quere ējōpeori masū niyugū, fariseo masū niwū. ⁶ Yu'u tere uputu waro ējōpeoyugū, Jesucristore ējōpeori curuacjārārē ña'arō weewu. Moisé duti'quema queoro weewu. Ne ni'cū yu'ure “Queoro weetiwī”, nímāsītisami. ⁷ Todūporopure “Yu'u

niseti'quere yu'ure añuyuru'a", nimiwũ. Ni'cãrõacãrẽ "Yu'u Jesucristore ãjõpeogu, nipe'tise toduporo cjase wamarĩ'i", ni tu'oña'a. ⁸ Apeyema, yu'u wioгу Jesucristore masise wapatiyuru'a. Apeyenojõ yu'u cuobo'que nemorõ wapati'i. Jesucristore ãjõpeose bul'iri nipe'tise yu'u weeseti'quere, niseti'quere marĩ uatistere cõ'arã weronojõ cõ'awũ. Jesucristo yu'u wioгуre cuosĩ'rigũ, tojo weewu. ⁹ A'tiro u'a. Jesucristore yu'u me'rã nicã u'a. Moisé duti'quere weese me'rã Õ'acũ yu'ure "Añugũ nimi", nisome. Yu'u Jesucristore ãjõpeose me'rã pe'e Õ'acũ yu'ure añurõ i'asami. Yu'u ãjõpeose bul'iri yu'ure queoro weecã weemi. ¹⁰ Yu'u a'tiro dia'cũ weesĩ'rĩ'i. Cristore añurõ masĩsĩ'rĩ'i. Õ'acũ cũ tutuaro me'rã yu'ure ducayunu'cũcã u'a. Cũ tutuase me'rã Cristore masõcu niwĩ. Cristo cũ pacu yere wéegu, pi'eti, curusapu wẽricu niwĩ. Yu'u quẽ'rã Õ'acũ yere uputu weesĩ'rĩ'i. Jesucristo yere wẽrigũpu, weetuosi'rĩ'i. ¹¹ Wẽrĩ'cãrã masãmujãarãsama. Yu'u quẽ'rã na weronojõ mejãrõta masãmujãasi'rĩsa'a.

Marĩ añurõ yu'rusi'rĩrã, wãcũtutuaroua'a nise ni'i

¹² Yu'u a'te nipe'tisere "Jesucristo weronojõ weetu'ajanu'cõpe'otoja'a", nigũ mejẽta wee'e. Nipe'tisere queoro weewe'e yujupu. Tojo weetimicã, Jesucristo yu'ure cũ yagu sãjãcã weetocacu niwĩ. Tojo weegu cũ weronojõ nisĩ'rigũ, tutuaro me'rã cũ yere wee'e. ¹³ Acawererã, "Yu'u nipe'tisere queoro weetoja'a", niwe'e. A'tiro pe'e wee'e. Toduporo yu'u wee'quere wãcũwe'e. Be'ropu nitje pe'ere añurõ weetu'ajasi'rigũ, wãcũtutua'a. ¹⁴ Añurõ tu'ajanu'cõsĩ'rĩ'i. Õ'acũ umusepu o'omatjere ñ'esĩ'rigũ, nipe'tise cũ yere tutuaro me'rã wee'e. Marĩ Jesucristore ãjõpeorã niyucã, marĩrẽ catise pe'titiserẽ o'ogusami.

¹⁵ Nipe'tirã Jesucristore añurõ ãjõpeorã yu'u nĩ'caronojõta wãcũrõu'a. Musã mejẽcã wãcũcã, Õ'acũ

m̄sārē diačjũ wācũcā weeḡusami. ¹⁶ Marĩ Jesucristore ějōpeodu'pocāti'caronojōta queoro wācũ, queoro tu'ajanũ'cōrōna'a.

¹⁷ Acawererā, yu'u weesere ĩ'acũu sirutuya. Āpērārē ũsā weronojō weerārē na weese quē'rārē ĩ'acũña. ¹⁸ Tod̄poropu pejetiri m̄sārē weretojawu. Utise me'rā ninemogũti tja. A'tiro ni'i. Pājārā na ũa'arō weesetise me'rā Jesucristore ĩ'atu'tirā weronojō nima. Na cũ curusaru wēri'quere yabirā weronojō weema. ¹⁹ Be'rop̄re pecame'epu yapatirāsama. Ō'acūrē ějōpeotima. Na ũaripejase dia'cūrē ějōpeoma. Bopoyaronojō o'orā, na weese pe'ere “Añuyũ'rua'a”, niyu'runũ'cāma. A'ti nucũcā cjase dia'cūrē wācũma. ²⁰ Marĩ pūrĩcā u'm̄sep̄u wa'ari masā ni'i. Top̄u marĩ ya macā ni'i. Marĩ wioğ̄u Jesucristo marĩrē yu'ruoḡu u'm̄sep̄u nimi. Cũ a'ti nucũcāpu apaturi a'tiatjere yucuerā wee'e. ²¹ Cũ marĩ ya up̄u a'ti up̄umejārōrē d̄ucayuḡusami. Cũ ya up̄u weronojō añubutiari up̄u weeḡusami. Cũ nipe'tisere cũ doca tojacā weeḡusami. Cũ tojo weemasĩrōnojōta mejārōta cũ tutuaro me'rā marĩ quē'rārē d̄ucayuḡusami.

4

Jesucristo me'rā e'catinu'cũdutise ni'i

¹ Jesucristo marĩrē cũ ya up̄u añubutiari up̄re weronojō weeḡusami. Tojo weerā acawererā yu'u mairā, Jesucristore ne ějōpeodu'uticā'ña. M̄sārē pūrō ma'ĩ'i. Pūrō ĩ'asĩ'rĩ'i. M̄sā yu'ure e'caticā wee'e. M̄sā queoro weese me'rā yu'u bu'e'quere ĩ'o'o.

² Apeyema, m̄sānumia Evodia, Síntique, marĩ wioğ̄are ějōpeoyurā, a'merĩ m̄sā basu pe'sutiticā'ña. Ni'cārōnojō wācũña. ³ Sícigo, m̄u'u yu'u me'rā weretamugũ waro ni'i. Na numiarē ni'cārōnojō wācũcā weeya. Ō'acũ masārē yu'ruomi nise quetire werecā, na numia yu'ure

weretamuwã. Na me'rã Clemente quẽ'rã niwĩ. Tojo nicã ãpẽrã na me'rã yu'ure weretamuwã. Na Ô'acũ ya pũrĩ catinu'cũse nirĩ pũrĩpũ ojaõ'ono'cãrã nitojasama.

⁴ Mũsã Jesucristo yarã nitjĩarã, cũ me'rã e'catinu'cũcã'ña. Apaturi ninemogũti. E'catidu'uticã'ña. ⁵ Mũsã ãpẽrãrẽ pajaña'sere nipe'tirã masĩato. Marĩ wiogu a'tiatjo cã'rõacã du'sa'a.

⁶ No'o de'ro wa'asere wãcũque'titicã'ña. A'tiro pe'e weeya. Nipe'tise mũsãrẽ no'o wa'asere Ô'acũrẽ sẽrĩña. Cũrẽ sẽrĩrã, e'catise o'oya. ⁷ Mũsã tojo weecã, Ô'acũ ejerisãjãcã weegũsami. Cũ tojo weese añubutiasẽ ni'i. Masã na tu'opõtẽotise ni'i. Mũsã Jesucristo yarã niyucã, mũsãrẽ añurõ ejeripõ'rãticã weegũsami. Tojo nicã mũsã wãcũsepure añurõ tu'oña'nu'cũcã weegũsami.

Añuse dia'cũrẽ wãcũnurũdutise ni'i

⁸ Acawererã, yu'u a'tiro ojatũoguti. Nipe'tise diacjũ nisere wãcũña. Nipe'tise a'teta wiopesa'a nisere wãcũña. Queorota nitu'sa'a nisere wãcũña. Añuse warore wãcũña. Añuse tu'sasere wãcũña. Masã añurõ ucũno'sere wãcũña. Nipe'tise añusere, e'catipeosenojõrẽ wãcũña.

⁹ Yu'u mũsãrẽ bu'egu ucũcã tu'o'quere “A'tiro weerõa'a” ni'quere weeya. Yu'u de'ro weecã i'a'quere weeya. Tojo weecã, Ô'acũ ejerisãjãsere o'ogu mũsã me'rã nigũsami.

Filipocjãrã Pablõre niyeru weetamu'que ni'i

¹⁰ Mũsã yu'ure apaturi weetamusere i'agũ, yu'u marĩ wiogu me'rã pũrõ e'cati'i. “Mũsã yu'ure wãcũtiwu”, nigũ mejẽta wee'e. Mũsãrẽ yu'ure weetamuta basiotiwũ. ¹¹ “Apeyenojõ yu'ure du'sa'a”, nigũ mejẽta wee'e. No'o yu'u cuose me'rã e'catimasĩ'i. ¹² Yu'u pajasecuogu e'catise me'rã nĩmasĩ'i. Peje cuogu quẽ'rã nĩmasĩ'i. Yu'ure no'o de'ro wa'acã, e'catise me'rã nĩmasĩ'i. Yu'u yapigu,

yapitigũ quẽ'rã, e'catimasĩ'i. Peje c̣ooyũ'rũmajãgũ, e'catimasĩ'i. Móogũ quẽ'rã, e'catimasĩ'i. ¹³ Jesucristo yũ'ure tutuase o'ogũ me'rã nipe'tisere nu'cãmasĩ'i. ¹⁴ Tojo nimicã, yũ'u pi'etiri cura yũ'ure weetamurã, añurõ weewũ.

¹⁵ Mũsã Filipocjãrã a'tiro masĩ'i. Yũ'u Macedonia di'ta mũsã tiropũ niwũ. Topũ nígũ, mũsãrẽ Jesucristo yere werenu'cãwũ. Be'ro apesepũ wijawã'cãwũ. Filipopũ ní'cũ wijacã, mũsã dia'cũ yũ'ure weetamurã niyeru o'owũ. Jesucristo ye quetire tũ'o'que wapa e'catirã, tojo weewũ.

¹⁶ Yũ'u Macedoniarũ ní'cũ wijase dũporo Tesalónicarũ nínicã, mũsã pejetiri yũ'ure niyeru o'owũ. ¹⁷ Yũ'u mũsãrẽ apeyenojõ o'oro dia'cũ uagũ mejẽta wee'e. A'tiro u'a. Õ'acũ i'orõpũre ãpẽrãrẽ apeyenojõ o'o'que me'rã mũsã nemorõ c̣ocã u'a. Mũsã o'ocã, Õ'acũ mũsãrẽ añurõ weegũsami. ¹⁸ Nipe'tise Epafrodito me'rã mũsã o'o'quere ñe'etojawũ. Tere ñe'egũ, yũ'u uase nemorõ c̣o'o. Mũsã o'o'que Õ'acũrẽ o'ose weronojõ ni'i. Cũ tojo weesere tũ'sami. ¹⁹ Õ'acũ yũ'u wiogũ nipe'tise mũsãrẽ dũ'sasenojõrẽ o'ogũsami. Cũ Jesucristo me'rã peje waro añubutiasẽ c̣ooyũ'rũnu'cãmi. Cũ c̣osenojõrẽ mũsãrẽ o'ogũsami. ²⁰ Marĩ pacũ Õ'acũrẽ e'catipeonu'cũrã. Tojota weerã.

Pablo añudutitũ'o'que ni'i

²¹ Nipe'tirã Jesucristore ãjõpeorã añuato. Marĩ acawererã yũ'u me'rã nirã mũsãrẽ añudutima. ²² Nipe'tirã a'tocjãrã Jesucristo yarã romano masã wiogũ ya wi'ipũ nirã quẽ'rã añudutima.

²³ Marĩ wiogũ Jesucristo mũsãrẽ añurõ weeato.

Tocã'rõta oja'a.

Pablo.

Õ'âkã hi yeere uúkũri turi Tukano
New Testament in Tucano (BR:tuo:Tucano)

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates
eBible.org

PDF generated using Haiola and XeLaTeX on 3 Jul 2018 from source files dated 14 Jun 2018

00ebd04f-7b0d-5a72-9407-eb53ae2bd086